

Gojgaeq Bouxgaujseng Bi 2018 Vahcuengh Sawcuengh Suijbingz Gaujsi (2)

2018 年度壮语文水平考试考生故事 (二)

□ Veiz Yingcinh Cau Dwzfeih raiz Dahlinz / 杨燕琳 hoiz

Yangz Yenlinz (boux-bien Sawcuengh): Aeu daih-it mbouj dwg moegbiu, lijaeu laebdaeb gauj

Youq mbaw dan cingzcik baiz gonqlaeng bi 2018 Vahcuengh Sawcuengh Suijbingz Gaujsi(gaugaep) gwnzde, Yangz Yenlinz boux ndaej 24 bi haenx gauj ndaej 81 faen cingzcik baizmingz daih'it. Bi 2016 gauj ndaej cunggaep gyapdaengj, bi 2017 gauj ndaej gaugaep ietdaengj, bineix gauj ndaej gaugaep gyapdaengj——Youq bouxwnq yawj daeuj de gaenq dwg bouxakhag ndeu, hoeng youq ndawsim de, aeu daih'it mbouj dwg moegbiu, mboujduenh daezsang Vahcuengh Sawcuengh suijsingz cij dwg gij gyaepgouz de. 8 nyied 20 hauh caz ndaej cingzcik baez gaujsi neix le, de doiq gicej naeuz “mbouj habhoz geijlai”, lij naeuz yaek caiq bae camgya gaujsi, “roengzrengz aeu mauhgvaq 90 faen”.

Neix gaenq dwg Yangz Yenlinz baez daihseiq camgya Vahcuengh Sawcuengh Suijsingz Gaujsi lo. De lij geiq ndaej, bi 2013 mwh swheij baez daih'it camgya gaujsi lij dwg boux hagseng dayoz it nienzgaep ngamq hag Sawcuengh. Dangguh boux hagseng Gvangjsih Minzcz Dayoz Cungguk siujsoq minzcz yijyen vwnzyoz ciennieb, de riengz gij iuheuh lauxsae bae camgya cogaep gaujsi, de gauj mbouj gvaq seizhaenx mbouj siengi daengz, daengzcog swheij aiq guh gij hong biensij haeddoiq Sawcuengh, ngoenzngoenz ndaej bae caeuq Sawcuengh doxgyau, caemhcaiq sim'angq dangqmaz.

“Ndaej aeu gij saeh gou gyaenz guh ciknieb, simvan lai.” Yangz Yenlinz naeuz, swheij daj iq couh youq ranzdaiq Rindaengj Yienh gvaq saedceij, aeu Vahcuengh caeuq vunz ndawranz, doengzhag gyaulouz, daengz ndaw singz hwnj cocung le, Vahcuengh couh gangj ndaej noix, mwh gauhgauj dienz ciyen dwg aenvih siengniemh caeuq vunz gangj Vahcuengh lai cij genj aen ciennieb neix, doiq baezlaeng dwg mbouj dwg aeu neix guh ciknieb mbouj bae siengi geijlai, mwh doegsaw hix cij dwg boux



▲Yangz Yenlinz.

►Yangz Yenlinz youq Gvangjsih Minzcz Dayoz hag ndaej Sawcuengh.

hagseng mbouj guhsing bae roengzrengz, mbouj hawj vunz haeujsim geijlai.

Mwh hwnj dayoz gij cingzcik ciennieb bonjfaenh mbouj dwg ceiq yienhda, aen sim maqmuengh rox ndaej engq lai haenx cix hawj de youq diuzroen aen ciennieb Vahcuengh Sawcuengh byaij ndaej engq gya. Yangz Yenlinz geiq ndaej, bi 2016 sujyay geizgan, daengx gih Vahcuengh Sawcuengh beizyinbanh youq Gvangjsih Minzcz Dayoz gawjhengz, de moix ngoenz cungj bae youq henz dingq, ndwen lai seizgan, moix ngoenz hwnjdangz haeujsim dingq, guh ndei bitgeiq, guh daez, roengzdangz couh yawj saw, “Mwh yawj saw baez bungzdaengz aen sawloih mbouj rox couh sikhaek caz saw sawloih, iugouz swheij itdingh aeu roxyiuj moix aen sawloih, doeklaeng caiq yungh doenghgi sawloih neix bae lienh sij faenzcieng dinj, cungj simcingz moix ngoenz maqmuengh hag haenx daengz seizneix lij geiq ndaej laeg dangqmaz.”

Doiq vahcoj miz gamjcingz laegna, caensim gyaenzmai Vahcuengh Sawcuengh, lauxsae nyinhcaen bae hag, neix hawj de daj boux mbouj caixhangz Vahcuengh Sawcuengh saekdi, baenz boux maenh'ak youq ndaw hangznied Vahcuengh Sawcuengh. Haeuj Gvangjsih Minzcz Cuzbanjse guhhong, ndaej doigawj hawj Swcigih Minzyiveij dangguh vunzcaiz boqyaem Vahcuengh, youq Vahcuengh Sawcuengh Suijsingz Gaujsi gauj ndaej daih'it, doenghgi neix cungj swyenz baenz lo.

Gicej cam de baenzlawz cij gauj ndaej faen sang seiz, de baez riuriu naeuz: “Gizsaed couh dwg bingzseiz lai yawj di lai doeg di.” Mwh hwnj dayoz cawzliux hagsib goq ciennieb, de lij doeg di saw Sawcuengh, seiz mbouj seiz yungh Sawcuengh fat veihsin, sij geij coenz gamjsiengj, geiq saeh. Mbouj gvaq duenh hawj de miz gamjsouh, lij dwg bi 2017 bizyez



gaxgonq daengz Gvangjsih Minzcz Cuzbanjse lienhguh 3 ndwen seizgan haenx. Lienhguh geizgan moix ngoenz aeu lai yawj faenzcieng Sawcuengh, moix cih moix coenz bae haeddoiq, neix hawj gij Vahcuengh Sawcuengh suijsingz de cinbu gig hung, “Seizde couh roxnyinh ‘w, couhdwg yiengh-neix lo’”, Yangz Yenlinz naeuz, “Lienhguh sat le gou bwh 3 ngoenz seizgan, bae camgya gaugaep gaujsi couh doenggvaq lo.”

Vahcuengh Sawcuengh Suijsingz Gaujsi gaugaep gyapdaengj, aen cingzcik neix doiq gunghcoz daeuj gangj gaenq gaeuq lai lo, hoeng de lij mbouj hozrim, “Gaujsi ndaej caz-niemh gij hagsib yaugoj gou duenh seizgan ndeu.” Yangz Yenlinz naeuz, maqmuengh doenggvaq gij ginglig swheij yingyangj vunz henz ndang, daiqdoengh engq lai vunz bae hag Vahcuengh Sawcuengh.